



გადაწყვეტილება

N გ-24-16/287
20/06/2024

287-გ-24-1-4-202406201749



შპს „სელფი მობაილისთვის“ შპს „ეარსისტემსთან“ ურთიერთჩართვის შეჩერებაზე კომისიის თანხმობის მიცემის შესახებ

მომჩივანი: შპს „სელფი მობაილი“

მოპასუხე: შპს „ეარსისტემს“

დავის საგანი: ურთიერთჩართვიდან გამომდინარე დავალიანების გადაუხდელობა

კომისიის სხდომის თარიღი: 2024 წლის 30 მაისი, 13 ივნისი, 20 ივნისი.

I. აღწერილობითი ნაწილი

1. მომჩივანის პოზიცია

- საქართველოს კომუნიკაციების ეროვნულ კომისიას (შემდგომში: „კომისია“) შპს „ეარსისტემის“ წინააღმდეგ განცხადებით (შ-24-6/2455 23.05.2024) მიმართა შპს „სელფი მობაილმა“. განცხადებაში მითითებულია, რომ შპს „სელფი მობაილი“ შპს „ეარსისტემს“ 2020 წლის 15 ივნისიდან დღემდე უწყევს ურთიერთჩართვის მომსახურებას მათ შორის გაფორმებული ხელშეკრულებების საფუძველზე. აღნიშნული სახელშეკრულებო ურთიერთობის ფარგლებში შპს „ეარსისტემს“ შპს „სელფი მობაილის“ მიმართ ეკისრება დავალიანება 62 002, 89 ლარის ოდენობით.
- შპს „სელფი მობაილის“ განცხადების თანახმად, შპს „სელფი მობაილმა“ 2023 წლის 1-ელ ნოემბერს წერილობით მიმართა შპს „ეარსისტემს“ და მოითხოვა დავალიანების დაფარვა, ასევე გააფრთხილა, რომ გადაუხდელობის შემთხვევაში შპს „სელფი მობაილი“ მიმართავდა კომისიას ურთიერთჩართვის შეჩერების მოთხოვნით, თუმცა დავალიანება დღემდე არ არის დაფარული.
- შპს „სელფი მობაილი“ ითხოვს შპს „ეარსისტემსთან“ ურთიერთჩართვის შეჩერებას.
- „შპს „ეარსისტემის“ წინააღმდეგ შპს „სელფი მობაილის“ განცხადების განსახილველად მიღებისა და დავის განხილვის დღის დანიშვნის შესახებ“ კომისიის 2024 წლის 30 მაისის Nგ-24-16/236 გადაწყვეტილებით დავის განხილვის დღედ განისაზღვრა 2024 წლის 13 ივნისი, 15:00 საათი.

5. კომისიის 2024 წლის 13 ივნისის სხდომაზე არ გამოცხადდა შპს „ერსისტემის“ წარმომადგენელი. „ელექტრონული კომუნიკაციების შესახებ“ საქართველოს კანონის 41-ე მუხლის პირველი პუნქტის მიხედვით, დავის განხილვა მხარის (მხარეების) გამოუცხადებლობის შემთხვევაში გადაიდება კომისიის შემდეგი სხდომისთვის. კომისიის სხდომა გადაიდო 2024 წლის 20 ივნისის სხდომისთვის.
6. 2024 წლის 20 ივნისის სხდომაზე გამოცხადდნენ შპს „სელფი მობაილის“ წარმომადგენელი ი. ესართია, შპს „ერსისტემის“ წარმომადგენელი მ. გოგობერიძე და განაცხადეს, რომ მორიგება ვერ შედგა.

2. მოპასუხის პოზიცია

7. შპს „ერსისტემის“ წარმომადგენელმა მ. გოგობერიძემ კომისიის 2024 წლის 30 მაისის და 20 ივნისის სხდომებზე აღნიშნა, რომ სს „ერსისტემს“ ნამდვილად აქვს შპს „სელფი მობაილის“ დავალიანება და დაადასტურა დავალიანების ოდენობა, ასევე აღნიშნა, რომ კომპანია დავალიანების სრულად დაფარვას ვერ შეძლებს 2025 წლის დასაწყისამდე.

II. მარეგულირებელი კანონმდებლობა

8. „ელექტრონული კომუნიკაციების შესახებ“ საქართველოს კანონის მე-11 მუხლის მე-3 პუნქტის „ვ“ ქვეპუნქტის მიხედვით, კომისიის ძირითად ფუნქციებს მიეკუთვნება ელექტრონული კომუნიკაციების სფეროში საქმიანობის განმახორციელებელ ავტორიზებულ პირთა შორის, აგრეთვე მათსა და მომხმარებლებს შორის წარმოშობილი დავების გადაწყვეტა თავისი უფლებამოსილების ფარგლებში, ხოლო „ე“ ქვეპუნქტის შესაბამისად, ელექტრონული საკომუნიკაციო ქსელის ელემენტებთან დაშვების ან/და ურთიერთჩართვის ტექნიკურ-ეკონომიკური და სამართლებრივი ურთიერთობების რეგულირება.
9. „ელექტრონული კომუნიკაციების შესახებ“ საქართველოს კანონის მე-19 მუხლის მე-3 პუნქტის მიხედვით, ელექტრონული საკომუნიკაციო ქსელის ოპერატორმა, რომელიც ადგილობრივი მომსახურების ზონაში სააბონენტო ნუმერაციის რესურსის გამოყენებით ახორციელებს ბოლო მომხმარებლების მომსახურებას, უნდა უზრუნველყოს საკუთარი ქსელის შესაბამის ელემენტებთან დანახარჯებზე ორიენტირებული ტარიფებით შეუზღუდავი და არადისკრიმინაციული დაშვებით სხვა მსურველი ოპერატორებისათვის ან ელექტრონული საკომუნიკაციო უწყებრივი ქსელის მფლობელი პირებისათვის ურთიერთჩართვის პირდაპირი ან არაპირდაპირი მიწოდება. დაუშვებელია ელექტრონული საკომუნიკაციო ქსელის ოპერატორებს შორის მოქმედი ურთიერთჩართვის შეწყვეტა. ურთიერთჩართული ელექტრონული საკომუნიკაციო ქსელის ოპერატორის მიერ მოქმედი ურთიერთჩართვის ხელშეკრულების პირობების შეუსრულებლობის შემთხვევაში ხელშეკრულების მეორე მხარე უფლებამოსილია ამ პირობების შესრულების უზრუნველსაყოფად შეაჩეროს მოქმედი ურთიერთჩართვა მხოლოდ კომისიის თანხმობით და მის მიერ განსაზღვრული ვადითა და პირობებით.

10. „ელექტრონული კომუნიკაციების შესახებ“ საქართველოს კანონის 36-ე მუხლის მიხედვით, კომისია ავტორიზებულ პირებს შორის წარმოშობილ დავებს წყვეტს საქართველოს კანონმდებლობით მისთვის მინიჭებული უფლებამოსილების ფარგლებში, ავტორიზებულ პირს უფლება აქვს მიმართოს კომისიას დავის განხილვისა და გადაწყვეტის მიზნით.

III. სამოტივაციო ნაწილი

1. გამოკვეთული მტკიცებულებები

11. შპს „სელფი მობაილის“ განცხადება (შ-24-6/2455 23.05.2024).
12. შპს „სელფი მობაილისა“ და შპს „ეარსისტემის“ შორის 2020 წლის 15 ივნისსა და 2023 წლის 31 მარტს ურთიერთჩართვასთან დაკავშირებით გაფორმებული მომსახურების ხელშეკრულებები.
13. შპს „სელფი მობაილის“ მიერ წარმოდგენილი ელექტრონული მიმოწერა, მხარეთა შორის გაწეული მომსახურებისა და წარმოშობილი ვალდებულებების დადასტურების თაობაზე.
14. კომისიის აპარატის კონკურენციის ხელშეწყობისა და ბაზრის რეგულირების დეპარტამენტის 20.06.2024 N24-10-1147 სამსახურებრივი ბარათი.
15. კომისიის 2024 წლის 30 მაისის და 20 ივნისის სხდომებზე შპს „სელფი მობაილის“ წარმომადგენლის ი. ესართიასა და შპს „ეარსისტემის“ წარმომადგენლის მ.გოგობერიძის მიერ მიცემული ახსნა-განმარტებები.
16. შპს „სელფი მობაილისა“ და შპს „ეარსისტემის“ შესახებ მონაცემები კომისიის უწყებრივი რეესტრიდან და საჯარო რეესტრის სამეწარმეო და არასამეწარმეო (არაკომერციული) იურიდიულ პირთა რეესტრიდან.

2. დადგენილი ფაქტობრივი გარემოებები

17. შპს „სელფი მობაილი“ და შპს „ეარსისტემს“ არიან ელექტრონული კომუნიკაციების სფეროში ავტორიზებული პირები.
მტკიცებულება: შპს „სელფი მობაილისა“ და შპს „ეარსისტემის“ შესახებ მონაცემები კომისიის უწყებრივი რეესტრიდან.
18. შპს „სელფი მობაილისა“ და შპს „ეარსისტემს“ 2020 წლის 15 ივნისსა და 2023 წლის 31 მარტს გაფორმებული აქვთ ურთიერთჩართვასთან დაკავშირებით მომსახურების ხელშეკრულებები. მტკიცებულება: ხელშეკრულებები (15.06.2020, 31.03.2023).
19. მხარეებს შორის მოქმედი ურთიერთჩართვიდან გამომდინარე შპს „ეარსისტემს“ ერიცხება შპს „სელფი მობაილის“ მიმართ დავალიანება 62 002, 89 ლარის ოდენობით.
მტკიცებულება: 1. შპს „სელფი მობაილისა“ და შპს „ეარსისტემს“ შორის 2020 წლის 15 ივნისსა და 2023 წლის 31 მარტს ურთიერთჩართვასთან დაკავშირებით გაფორმებული მომსახურების ხელშეკრულებები. 2. შპს „სელფი მობაილის“ მიერ წარმოდგენილი ელექტრონული მიმოწერა, მხარეთა შორის გაწეული მომსახურებისა და წარმოშობილი ვალდებულებების დადასტურების თაობაზე. 3. კომისიის 2024 წლის 30 მაისის და 20 ივნისის სხდომებზე შპს „ეარსისტემის“

წარმომადგენლის მ.გოგობერიძის მიერ მიცემული ახსნა-განმარტებები დავალიანების აღიარების თაობაზე.

20. კომისიის აპარატის კონკურენციის ხელშეწყობისა და ბაზრის რეგულირების დეპარტამენტის 20.06.2024 N24-10-1147 სამსახურებრივი ბარათის მიხედვით, კომისიაში არსებული ინფორმაციის შესაბამისად, შპს „ეარსისტემს“ არ ჰყავს ბოლო მომხმარებელი და 2021 წლის ნოემბრიდან კომისიაში წარმომადგენს ინფორმაციას მხოლოდ არასტანდარტული სახის მოკლე ტექსტური შეტყობინებების (Bulk SMS) მომსახურებაზე.

მტკიცებულება: კომისიის აპარატის კონკურენციის ხელშეწყობისა და ბაზრის რეგულირების დეპარტამენტის 20.06.2024 N 24-10-1147 სამსახურებრივი ბარათი.

3. სამართლებრივი შეფასება

21. „ელექტრონული კომუნიკაციების შესახებ“ საქართველოს კანონის მე-19 მუხლის მე-3 პუნქტის მიხედვით, ურთიერთჩართული ელექტრონული საკომუნიკაციო ქსელის ოპერატორის მიერ მოქმედი ურთიერთჩართვის ხელშეკრულების პირობების შეუსრულებლობის შემთხვევაში ხელშეკრულების მეორე მხარე უფლებამოსილია ამ პირობების შესრულების უზრუნველსაყოფად შეაჩეროს მოქმედი ურთიერთჩართვა მხოლოდ კომისიის თანხმობით და მის მიერ განსაზღვრული ვადითა და პირობებით.
22. შპს „ეარსისტემის“ მიერ აღიარებულია და უდავოა, მოქმედი ურთიერთჩართვის შედეგად, შპს „ეარსისტემის“ შპს „სელფი მობაილს“ მიმართ შეუსრულებელი ფინანსური ვალდებულება 62 002, 89 ლარის ოდენობით.
23. გარდა ამისა, როგორც კომისიის მიერ გამოკვლეული ფაქტობრივი გარემოებების ანალიზიდან ირკვევა, შპს „ეარსისტემსა“ და შპს „სელფი მობაილს“ შორის ურთიერთჩართვის შეჩერების შემთხვევაში, არ დაზარალებიან ბოლო მომხმარებლები, ვინაიდან შპს „ეარსისტემს“ ბოლო მომხმარებლები არ ჰყავს.
24. ამრიგად, კომისია მიიჩნევს, რომ არსებობს „ელექტრონული კომუნიკაციების შესახებ“ საქართველოს კანონის 19-ე მუხლის მე-3 პუნქტით გათვალისწინებული ურთიერთჩართვის შეჩერების თაობაზე თანხმობის გაცემის ფაქტობრივი და სამართლებრივი წინაპირობები.
25. ამასთან, შპს „ეარსისტემს“ უნდა მიეცეს ვადა შპს „სელფი მობაილს“ მიმართ არსებული დავალიანების დასაფარად, 10 სამუშაო დღის ოდენობით.
26. შპს „სელფი მობაილს“ უნდა მიეცეს თანხმობა შპს „ეარსისტემსთან“ მოქმედი ურთიერთჩართვის შეჩერებაზე, კომისიის მიერ განსაზღვრულ ვადაში შპს „ეარსისტემის“ მიერ შპს „სელფი მობაილს“ მიმართ არსებული დავალიანების გადაუხდელობის შემთხვევაში, დავალიანების სრულად დაფარვამდე.

IV. სარეზოლუციო ნაწილი

„ელექტრონული კომუნიკაციების შესახებ“ საქართველოს კანონის მე-11 მუხლის მე-3 პუნქტის „ვ“ და „ე“ ქვეპუნქტების და მე-19 მუხლის მე-3 პუნქტის საფუძველზე, კომისიამ, კენჭისყრის შედეგად,

გადაწყვეტა:

1. შპს „სელფი მობაილს“ მოთხოვნა შპს „ეარსისტემსთან“ მოქმედი ურთიერთჩართვის შეჩერებაზე კომისიის თანხმობის მიცემის შესახებ, დაკმაყოფილდეს.
2. შპს „სელფი მობაილს“ მიეცეს თანხმობა შპს „ეარსისტემსთან“ მოქმედი ურთიერთჩართვის შეჩერების თაობაზე, შპს „ეარსისტემის“ მიერ წინამდებარე გადაწყვეტილების ჩაბარებიდან 10 დღის ვადაში შპს „სელფი მობაილს“ მიმართ მოქმედი ურთიერთჩართვიდან წარმოშობილი ვალდებულების, კერძოდ, 62 002, 89 ლარის ოდენობით ფულადი ვალდებულების შეუსრულებლობის/არაჯეროვნად შესრულების შემთხვევაში, ამ დავალიანების სრულად დაფარვამდე.
3. დაევალოს კომისიის ადმინისტრაციას გადაწყვეტილების ან გადაწყვეტილების დამოწმებული ასლის მხარეებისთვის გაგზავნა და კომისიის ოფიციალურ ვებგვერდზე (www.comcom.ge) გამოქვეყნება.
4. გადაწყვეტილება ძალაში შედის გადაწყვეტილების ან გადაწყვეტილების დამოწმებული ასლის მხარეებისთვის ჩაბარებისთანავე;
5. გადაწყვეტილება შეიძლება გასაჩივრდეს თბილისის საქალაქო სასამართლოს ადმინისტრაციულ საქმეთა კოლეგიაში (მისამართი: ქ. თბილისი, დავით აღმაშენებლის ხეივანი №64) გადაწყვეტილების ან მისი დამოწმებული ასლის მხარეებისთვის ჩაბარების დღიდან ერთი თვის ვადაში.
6. კონტროლი გადაწყვეტილების შესრულებაზე დაევალოს კომისიის ადმინისტრაციას (ო. ვოტ).

ვახტანგ აბაშიძე

თავმჯდომარე - მ.შ.

ივანე მახარაძე

წევრი

ნათია კუკულაძე

წევრი

